



## Grupo Provincial Socialista

Rúa Progreso, 32 – 2º andar  
32003 Ourense  
Tlf. 988 317992  
CIF: G32244345

**ELVIRA LAMA FERNÁNDEZ**, deputada do Grupo Provincial Socialista da Deputación de Ourense, en base ao previsto na Lei de Bases Reguladora do Réxime Local, ó artigo 91 e 97, entre outros, da Regulación de Organización, Funcionamento e Réxime Xurídico das Entidades Locais e o Regulamento desta corporación presenta para o seu debate e aprobación a seguinte **MOCIÓN SOBRE O FINANCIAMENTO DOS CONSERVATORIOS PROFESIONAIS DE MUSICA DA PROVINCIA DE OURENSE**.

O Grupo Provincial Socialista desta Deputación provincial ten presentado diferentes iniciativas sobre o financiamento dos conservatorios que existen na provincia de Ourense. Na actualidade contamos con conservatorios profesionais de musica nos concellos de O Barco de Valdeorras, O Carballiño, Ribadavia, Verín e Xinzo de Limia, sendo, ao amparo da lexislación vixente, a Consellería de Educación da Xunta de Galicia a que regula este tipo de centros. En varias ocasións temos denunciado a flagrante discriminación da devandita Consellería, que financia o 100% do Conservatorio de grao profesional de Ourense capital, limitándose a unha simbólica aportación por alumno/a matriculado/a no resto de centros que, sitos no resto de vilas da provincia, ofrecen exactamente a mesma titulación e capacitación. Certo que se trata dunha aportación que foi incrementándose paseniñamente co tempo, pero que, aínda así, dista moito de cubrir os gastos reais dunhas instalacións que contan cun importante volume de profesorado, en función das disciplinas impartidas, amais dos custes en bens, subministracións e instrumentos necesarios para cumprir coas necesidades do curso escolar e cos imperativos da lexislación vixente.

Os conservatorios profesionais de musica que están nas cabeceiras de comarca, e que son financiados exclusivamente por cada un dos concellos nos que se sitúa o centro, reciben alumnos e alumnas das súas respectivas áreas de influencia. Tras cursar até dez niveis nas diversas especialidades musicais ofertadas, ao remate dos dez cursos as alumnas e os alumnos obteñen a titulación de grao profesional, que os habilita para cursar estudos superiores de música en calquera dos dous centros de grao superior que existen en Galicia (Santiago de Compostela e Vigo). Esta oferta educativa musical é, asemade, complementaria cos estudos de primaria e secundaria que as alumnas e alumnos realizan nestes centros, sen ter que desprazarse á capital, reducindo deste xeito os tempos de traslado e os custes para as familias, facilitando a compatibilidade para unha mellor optimización dos tempos de estudo. Doutra banda, o conservatorio da cidade non sería capaz de asumir un incremento tan substancial no número de prazas, o cal implica que este servizo non se prestaría, que moitas familias quedarían sen atender no caso de que non fose asumido polos concellos.

O grupo provincial socialista xa presentou en decembro de 2019 unha proposta de acordo para chegar a un acordo de financiamento entre a Xunta de Galicia, a Deputación provincial e os concellos. Tal e como recollen as actas daquel pleno, no debate daquela moción o grupo Popular afirmou que se trataba dunha competencia autonómica, aseveración compartida por todos os grupos da corporación (BNG, DO e Ciudadanos), sendo aprobada a emenda de substitución presentada por PP e DO que demandaba “instar ao goberno provincial a dirixirse á Xunta de Galicia para, en colaboración cos concellos, traballar nun modelo de financiamento dos conservatorios municipais que, atendendo a criterios técnicos e de calidade no ensino, permita outorgar, unha maior estabilidade no seu financiamento”. Nada máis se soubo daquel acordo, nin se produciron conversas entre

[socialistaourense@gmail.com](mailto:socialistaourense@gmail.com)

[Facebook: PSdeGdeOurense](#)

[Twitter: @PSdeGDepOU](#)



## Grupo Provincial Socialista

Rúa Progreso, 32 – 2º andar  
32003 Ourense  
Tlf. 988 317992  
CIF: G32244345

administracións. Namentres, os concellos seguen a soportar os elevados gastos destes centros de ensino, agás o conservatorio da capital, que segue a estar completamente sufragado polo goberno autonómico, no que supón unha clara discriminación cara os outros concellos, que teñen moita menor capacidade económica para ofertar este servizo.

A mediados do mes de decembro de 2016, responsables locais da Federación Galega de Municipios e Provincias (Fegamp) resolveron trasladar á Xunta a demanda de constitución dunha mesa de negociación para abordar o financiamento dos conservatorios profesionais de música, sufragados na súa totalidade polas arcas locais. En Galicia son máis de 30 os centros que imparten esta formación, dos que nove están xestionados pola administración autonómica. Isto supón unha importante carga económica para os municipios que só contan cos fondos propios, considerando os responsables locais da Fegamp na importancia de garantir a continuidade destes centros, a súa maioría situados nas cabeceiras de comarca, dado que os autonómicos non teñen prazas suficientes para cubrir a demanda formativa. O obxectivo era abrir unha mesa de negociación para garantir a viabilidade económica que asegure o seu futuro. Unha demanda lexítima da Fegamp, dos alcaldes concernidos e do Grupo Provincial Socialista, e á que responde unha das partidas comprendidas na máis recente modificación de crédito desta Deputación, que contempla unha partida específica de 200.000€ a repartir entre os cinco conservatorios profesionais da provincia. Un xesto a tomar en consideración por parte da Deputación que, porén, entóxase insuficiente para cubrir os custes reais destes centros, que deberan ser asumidos na súa totalidade pola Xunta de Galicia.

Por todo o exposto o Grupo Provincial Socialista presenta as seguintes **PROPOSTAS DE ACORDO**:

**PRIMEIRA.-** Solicitar que a Deputación de Ourense demande á Xunta de Galicia que asuma a financiación completa dos cinco conservatorios de grao profesional da provincia de Ourense, a saber, Verín, Xinzo de Limia, O Barco de Valdeorras, Carballiño e Ribadavia.

**SEGUNDA.-** Namentres non se logra facer efectiva a financiación autonómica, instar á Deputación de Ourense a incrementar gradualmente o co-financiamento anual e as axudas dirixidas aos concellos que dispoñen de conservatorios profesionais.

En Ourense, a 11 de abril de 2024.

Asinado: Elvira Lama Fernández

**SR. PRESIDENTE DA DEPUTACIÓN PROVINCIAL DE OURENSE**

[socialistaourense@gmail.com](mailto:socialistaourense@gmail.com)

Facebook: [PSdeGdeOurense](#)

Twitter: [@PSdeGDepOU](#)